

ասացածներով: Ասլանի նոյն տեսակ պատասխանները ստիպեցին սրբազանին փոխել իր խօսակցութեան ձեւը:

– Դուք եւ Վարազ այցելեցիք, այնպէս չէ՞, պարոն բժշկապետ, – հարցրեց Նա, – ինչպէ՞ս գտաք այդ վանքը եւ այնտեղի նոր հիմնարկութիւնները. տեսնեցա՞ք արդեօք Չայրիկի հետ:

– Տեսնեցայ եւ շատ բաւական մնացի, – ասաց Ասլանը: – Նրա վանքը մի գեղեցիկ օրինակ պէտք է համարել, որ եթէ կղերը կմասնակցէ ժողովրդի դաստիարակութեան գործին, ահա այդ ձեւով պէտք է մասնակցէ:

– Այդ իմ փափագելի ցանկութիւնն է, պարոն բժշկապետ: Իմ ջանքերը դեռ բոլորովին չեն սպառուել Վարագի վրայ: Ես աշխատում եմ եւ պիտի շարունակեմ աշխատել, եթէ միջոցները ինձ թոյլ տան, իմ վիճակի մէջ գտնուած բոլոր վանքերին նոյն ձեւը տալ: Մեր վանքերը, ժամանակների դժբախտ հանգամանքներից, այժմ շատ եւ շատ թշուառ դրութեան մէջ են: Իմ բոլոր ջանքը այն է՝ բարձրացնել նրանց իրանց անկեալ դրութիւնից:

Պէտք է վերին աստիճանի ցած կեղծաւորութիւն համարել, որ Չայրիկի եւ նրա վանքի ամենամեծ թշնամին այդպէս էր խօսում: Նա, որ ամեն գաղտնի եւ յայտնի միջոցներ գործ էր դնում ոչնչացնելու Վարագայ բոլոր հիմնարկութիւնները, այժմ նրա փառքը եւ նախածեռնութիւնը իրան էր վերաբերում: Բայց սրբազանը այդ մասին կարճ կտրեց, խօսքը փոխելով.

– Ես ձեզանով եւ ձեր ճանապարհորդութեան արկածներով այնքան գրաւեցայ, որ բոլորովին մոռացայ իմ հիւրերին ծանօթացնել ձեզ: – Ահա դա, – Նա ցոյց տոեց այնտեղ նստած քուրդ բեկին, – քրդերի մի մեծ եւ քաջ ցեղի զխաւորն է, Շարիֆ-բեկը:

– Շատ ուրախ եմ ծանօթանալ, – ասաց Ասլանը ձեռքը մեկնելով քուրդ բեկին:

– Ամենապատուական մարդ է եւ իմ ամենալաւ բարեկամը, – առաջ տարաւ առաջնորդը: – Դրա շնորհիւ մեր եւ Պարսկաստանի սահմանագլուխները կատարեալ ապահովութիւն եւ հանգստութեան են վայելում: Տեղային քրիստոնեայ բնակիչների բարեխնամ պաշտպանն է եւ հովանաւորողը:

Ես իսկոյն ճանաչեցի քուրդ բեկին, երեւի Ասլանը ինձանից առաջ ճանաչել էր: Դա նոյն անձնաւորութիւնն էր, որին տեսանք սուրբ Տիրամօր վանքում, որտեղ եկել էր Նա ուխտաւորներից գոյացած արդիւնքը բաժանելու Կարապետ հայր սուրբի հետ: Դա նոյն անձնաւորութիւնն էր, որի՝ Ասլանի մասին գրած մատնութեան նամակը անցեալ գիշեր կարդացիւք տեր Եղի-